

Reglur nr. 611/2009 með breytingum nr. 246/2010

## Hug- og félagsvísindasvið Háskólans á Akureyri

1. gr.

### *Markmið og stefna*

Meginmarkmið fræðasviðsins er að bjóða upp á háskólanám og standa fyrir rannsóknum í hug- og félagsvísindum, þar með talið félagsvísindum, lögfræði og menntunarfræðum. Fræðasviðið mótar sér stefnu til nokkurra ára í senn í samræmi við grunnmarkmið sín og stefnu Háskólans á Akureyri hverju sinni. Stefna hug- og félagsvísindasviðs árin 2008-2011 byggist á stefnu og framtíðarsýn þeirra deilda sem runnu saman í eina við stofnun hug- og félagsvísindadeildar 1. ágúst 2008, þ.e. kennaradeildar og félagsvísinda- og lagadeildar.

Hug- og félagsvísindasvið starfar á grundvelli laga um háskóla nr. 63/2006, laga um opinbera háskóla nr. 85/2008 og reglna fyrir Háskólann á Akureyri nr. 387/2009.

2. gr.

### *Deildafundur (fræðasviðsfundur)*

Deildafundur hug- og félagsvísindasviðs, öðru nafni fræðasviðsfundur, fer með æðsta ákvörðunarvald í málefnum fræðasviðsins. Hann fjallar um meginatriði í starfsemi fræðasviðsins og ber ásamt forseta ábyrgð á að starfsemi þess sé í samræmi við lög og reglur. Fræðasviðsfundur gerir tillögu að ráðningu forseta fræðasviðsins, að undangenginni kosningu um umsækjendur. Á fræðasviðsfundi skal jafnframt kosinn staðgengill forseta til tveggja ára, sem og varastaðgengill. Nánar er kveðið á um verkefni deildafundar fræðasviðs í 16. gr. reglna fyrir Háskólann á Akureyri nr. 387/2009.

Á fræðasviðsfundi eiga sæti og atkvæðisrétt: Forseti, prófessorar, dósentar, lektorar og aðjúntar óháð starfshlutfalli, sérfræðingar og forstöðumaður miðstöðvar skólaþróunar, einn fulltrúi stundakennara úr hverri deild, tilnefndur af stundakennurum viðkomandi deildar til eins árs í senn, og einn fulltrúi nemenda úr hverri deild, tilnefndur af félagssamtökum þeirra til eins árs í senn.

3. gr.

### *Deildaráð*

Deildaráð starfar skv. 17. gr. reglna fyrir Háskólann á Akureyri nr. 387/2009. Ráðið fjallar um erindi sem varða mál einstakra nemenda og önnur málefni sem varða fræðasviðið. Fræðasviðsfundur setur nánari reglur um vald og verksvið deildaráðs.

Í deildaráði eiga sæti auk forseta fræðasviðs staðgengill hans, deildarformenn, brautarstjórar, forstöðumaður miðstöðvar skólaþróunar, einn fulltrúi kennara valinn af deildafundi til tveggja ára í senn og einn fulltrúi nemenda valinn af félagssamtökum þeirra til eins árs í senn.

4. gr.

### *Forseti*

Forseti hug- og félagsvísindasviðs er ráðinn af rektor til tveggja ára að fenginni umsögn fræðasviðsins, skv. 15. gr. reglna fyrir Háskólann á Akureyri nr. 387/2009. Um verkefni forseta er fjallað í 14. gr. sömu reglna. Forseti annast fundarboð til fulltrúa á fræðasviðsfundi og fundastjórnun á þeim. Hann er jafnframt formaður deildaráðs.

5. gr.  
*Deildir*

Hug- og félagsvísindasvið skiptist í þrjár deildir: *félagsvísindadeild, kennaradeild og lagadeild*.<sup>1</sup>

Hver deild ber ábyrgð á skipulagi og þróun þess náms sem fræðasviðið hefur samþykkt að fari fram innan deildarinnar. Innan hvernar deildar er boðið upp á minnst eina námsbraut, en með því er átt við skilgreinda samsetningu námskeiða sem nemandinn þarf að ljúka til að hljóta tiltekna námsgráðu.

Við skipulag náms í sálfræði er m.a. tekið mið af lögum um sálfræðinga nr. 40/1976.

Við skipulag kennaranáms er m.a. tekið mið af lögum um menntun og ráðningu kennara og skólastjórnenda við leikskóla, grunnskóla og framhaldsskóla nr. 87/2008, lögum um leikskóla nr. 90/2008, lögum um grunnskóla nr. 91/2008, lögum um framhaldsskóla nr. 92/2008 og viðkomandi reglugerðum.

Við skipulag náms í lögfræði er m.a. tekið mið af lögmannalögum nr. 77/1998 og reglugerð um próf til að öðlast réttindi til að vera héraðsdómslögmaður nr. 1095/2005.

6. gr.

*Miðstöð skólaþróunar við Háskólann á Akureyri*

Við hug- og félagsvísindasvið er starfrækt miðstöð skólaþróunar við Háskólann á Akureyri. Viðfangsefni miðstöðvar skólaþróunar lúta að hvers konar þróunar- og umbótastarfi í skólum og ráðgjöf við kennara, stjórnendur skóla og annað fagfólk er starfar að fræðslumálum. Hún hefur forgöngu um að kynna kennurum nýjungar á sviði skóla- og kennslumála, stendur fyrir rannsóknum á skólastarfi, fræðslu, og heldur ráðstefnur.

Fagleg ábyrgð á starfsemi miðstöðvar skólaþróunar er á hendi forstöðumanns, sem ráðinn er af rektor eftir tillögu deildafundar. Forstöðumaður skal hafa hlotið hæfnisdóm sem lektor, dósent eða prófessor á fræðasviði sem tengist starfsemi miðstöðvarinnar.

Við miðstöð skólaþróunar starfa sérfræðingar í menntavísindum. Þeir sinna ráðgjöf, þróunarverkefnum í skólum, námskeiða- og ráðstefnuhaldi og rannsóknum. Þeir geta sinnt kennslu við Háskólann á Akureyri og skal um það samið í hverju tilviki við forstöðumann miðstöðvarinnar að höfðu samráði við viðkomandi sérfræðing. Á sama hátt geta kennarar við Háskólann á Akureyri átt samstarf við miðstöð skólaþróunar vegna rannsóknar- og þróunarverkefna.

7. gr.

*Deildarformenn og deildarfundir*

Deildarformenn og deildarfundir bera ábyrgð á kennslu, kennslufyrirkomulagi og þróun náms. Deildarfundur gerir einnig tillögur til forseta um að auglýsa stöður, fjallar um umsóknir að fengnu dómnefndaráli og gerir tillögur til forseta um ráðningar.

Sæti í deild – og þar með seturétt, tillögurétt og atkvæðisrétt á deildarfundum – eiga aðjúnktar, lektorar, dósentar og prófessorar sem inna af hendi minnst 50% kennsluskyldu sinnar innan deildar og einn fulltrúi nemenda sem valinn er af félagssamtökum þeirra til eins árs í senn. Deildarformaður skal kosinn af deildarfundum til tveggja ára í senn, úr hópi fastráðinna lektora, dósentar og prófessora deildarinnar.

---

<sup>1</sup> Sbr. samþykkt háskólaráðs frá 28. september 2007. Í samþykktinni var stefnt að því að sjálfstæð hugvísindaskor (-deild samkvæmt núgildandi reglum) tæki til starfa haustið 2009. Ljóst er að þessu markmiði verður ekki náð, en á fræðasviðinu verður áfram stefnt að stofnun sjálfstæðrar hugvísindadeildar.

Einnig skal deildarfundur kjósa staðgengil deildarformanns til sama tíma. Einungis fræðasviðsfundur getur leyft frávík frá þessum ákvæðum.

Deildarformaður ber ábyrgð á starfsemi deildar, skipulagi, undirbúningi og framkvæmd náms, þróun og samskiptum og tekur einnig þátt í stjórn fræðasviðsins, m.a. með setu í deildaráði. Hann sér um samskipti við nemendur, áætlun kennslumagns, gerir tillögur um nýráðningar, velur umsjónarkennara hvers námskeiðs í samráði við forseta fræðasviðs og kemur að stundarskrárgerð í samvinnu við skrifstofu fræðasviðs. Deildarformaður stýrir deildarfundum og fylgir samþykktum fundanna eftir. Nánar er kveðið á um ábyrgð og verkefni deildarformanns í sérstakri starfslýsingu.

#### 8. gr.

##### *Brautarstjórar og kennarafundir*

Deildum er heimilt (en ekki skylt) að velja sérstaka brautarstjóra til að hafa umsjón með einni eða fleiri námsbrautum innan deildarinnar. Brautarstjórar eru kosnir á deildarfundum til eins árs í senn.

Brautarstjórn felur í sér samskipti við nemendur, setu í náms- og matsnefnd og forystu um samráð milli kennara um kennslu- og námsþróun. Nánar er kveðið á um ábyrgð og verkefni brautarstjóra í sérstakri starfslýsingu.

Kennarafundir eru vettvangur slíks samráðs og boðar brautarstjóri til slíkra funda eftir þörfum. Á kennarafund má kalla fastráðna kennara, lausráðna kennara, stundakennara og hverja þá aðra sem koma að kennslu innan námsbrautar hverju sinni.

#### 9. gr.

##### *Náms- og matsnefndir*

Náms- og matsnefndir gera tillögur um mat á fyrra námi og fyrirhuguðu skiptinámi nemenda í viðkomandi deild eða á námsbraut. Náms- og matsnefndir gera jafnframt tillögur til deildarfundar um breytingar á náms- og kennsluskrá. Náms- og matsnefnd skal skipuð minnst þremur fulltrúum kennara (aðjúnkta, lektora, dósentar eða prófessora), sem valdir skulu til tveggja ára í senn af viðkomandi deildarfundum og einum fulltrúa nemenda, sem er valinn af félagssamtökum þeirra til eins árs í senn. Nefndin skiptir sjálf með sér verkum. Nánar er kveðið á um skipan, hlutverk og verkferla náms- og matsnefnda í sérstakri samþykkt.

Náms- og matsnefndir á hug- og félagsvísindasviði eru fimm: í (1) lögfræði, (2) hugvísindum, (3) félagsvísindum, (4) grunnnámi í menntunar- og kennslufræðum og (5) framhaldsnámi í menntunar- og kennslufræðum. Námsnefndirnar skulu hafa formlegt samráð sín á milli með það fyrir augum að koma á sem mestri samvinnu um nám og námsframboð á fræðasviðinu. Stefnt skal að því að sameina náms- og matsnefndir (4) og (5) þegar heildstætt fimm ára kennaranám verður komið að fullu til framkvæmda.

#### 10. gr.

##### *Umsjónarmenn málaflokka*

Umsjónarmenn málaflokka bera sérstaka ábyrgð á tilteknum málaflokkum innan fræðasviðsins. Málaflokkar sem geta haft slíka umsjónarmenn eru til dæmis rannsóknir, alþjóðasamskipti, kynningarmál og frágangur náms- og kennsluskrár. Umsjónarmenn málaflokka eru kosnir á fræðasviðsfundi til tveggja ára í senn.

11. gr.

*Gildistaka og endurskoðun*

Reglur þessar sem samþykktar hafa verið í háskólaráði Háskólans á Akureyri eru settar á grundvelli laga nr. 95/2008 um opinbera háskóla og reglna fyrir Háskólann á Akureyri nr. 387/2009. Reglurnar öðlast þegar gildi.

Stjórnskipulag þetta og starfslýsingar skal endurskoðað reglulega og skal þá tekið mið af fenginni reynslu. Endurskoðað með breytingum á fræðasviðsfundi 3. febrúar 2010.

*Reglur þessar voru samþykktar í háskólaráði Háskólans á Akureyri 24. júní 2009.*

*Breytingar á reglunum voru samþykktar í háskólaráði 2. mars 2010.*